


宋東京考卷之十七



嘉興石匏周城續

淺草文庫

山嶽

夷山

按一統志夷山在安遠門內以山之平夷而名也


汴京遺蹟志 夷山在裏城內安遠門東以山之平夷

而得名一名夷門山古有夷門乃侯嬴監守之處太

史公曰吾過大梁之墟求問其所謂夷門夷門者城

之東門也而安遠門乃城之北門今北門內地勢頗

高似是夷山而司馬氏乃云東門意者古卒城垣改



徙不一今莫可考矣

艮嶽

按艮嶽在京城東北隅景龍門內徽宗登極之初皇嗣未廣道士劉混康建言京城東北隅地協堪輿倘形勢加以少高當有多男之祥始命為數仞岡阜已而後宮占熊不絕上喜甚由是崇信道教土木之工興矣政和七年十二月命戶部侍郎孟揆於上清寶籙宮東築山以象餘杭之鳳凰山號曰萬歲山周十餘里峯高九十步上有介亭分東西二嶺東有萼綠華堂書館八仙館紫石巖樓真磴攬秀軒觀吟堂山南則壽山嵯峨兩峯

並峙下有雁池雍雍亭西有藥寮西莊巢雲亭白龍泚濯龍峽蟠秀練光跨雲三亭羅漢巖又西有萬松嶺嶺畔有樓曰倚翠上下設兩關關下有平地鑿大方沼沼中有兩洲東為蘆渚浮陽亭西為梅渚雪浪亭西流為鳳池東出為研池中分二館東曰流碧西曰環山館有巢鳳閣三秀堂東池後有揮雲廳復由磴道上至介亭亭左有極目蕭森二亭右有麓雲半山二亭北俯景龍江引江之水流注山間西行為漱玉軒又行石間為煉丹亭凝真觀圖山亭下視江際見高陽酒肆清虛閣北岸有勝筠菴躡雲臺蕭閒館飛岑亭支流別為山莊為

迴溪又於南山之外為小山橫亘二里曰芙蓉城窮極
巧妙而景龍江外則諸館舍尤精山之西北有老君洞
為供奉道像之所其北又因瑤華宮火取其地作大池
名曲江池中有堂曰蓬壺東盡封邱門而止其西則自
天波門橋引水直西殆半里江乃折南又折北折南者
過閭闔門為複道通茂德帝姬宅折北者四五里屬之
龍德宮既成帝以山在艮位更名曰艮嶽而自為記初
朱勳於太湖取石高廣數丈載以大舟挽以千夫鑿城
斷橋毀堰拆牖數月乃至以是年為宣和五年會得燕
地因號昭功敷慶神運石立於萬歲山其旁植兩檜一

天矯者名曰朝日昇龍之檜一偃蹇者名曰卧雲伏龍
之檜皆以玉牌填金字書之徽宗御題云拔翠琪樹林
雙檜植靈囿上梢蟠木枝下拂龍髯茂撐擎天半分連
卷虹南負為棟復為梁夾輔我皇構巖曰玉京獨秀太
平巖峰曰卿雲萬態竒峰又作絳霄樓勢極高峻復出
雲表其後群閣興築不已於是山林巖壑日益高深亭
臺樓觀不可勝紀四方花竹竒石悉萃於斯珍禽異獸
無不畢有矣宣和六年詔以金芝產於艮嶽之萬壽峯
又改名壽嶽一曰壽山嶽之正門曰華陽故亦號華陽
宮迨靖康北狩金宣宗展築汴城命取艮嶽之土為北

面城垣改景龍江為城濠而池沼悉平遺址無存矣
御製良嶽記略 傳曰為山九仞功虧一簣是山可為
功不可書乃命太尉梁師成董其事遂以圖材畀之
俾按圖度地庀徒僦工累土積石設洞庭湖口絲谿
仇池之深淵與泗濱林慮靈璧芙蓉之諸山最瓌奇
特異瑤琨之石即姑蘇武林明越之壤荆楚江湘南
粵之野移枇杷橙柚橘柑榔栝荔枝之木金蛾玉羞
虎耳鳳尾素馨渠那茉莉含笑之草不以土地之殊
風氣之異悉生成長養於雕闌曲檻而穿石出罅岡
連阜屬東西相望前後相續左山而右水沿溪而傍

龐連綿彌滿吞山懷谷其東則高峯峙立其下植梅
以萬數綠萼承趺芬芳馥郁結構山根號萼綠華堂
又旁有承嵐崑雲之亭有屋內方外圓如半月是名
書館又有八仙館屋圓如規又有紫石之巖祈真之
磴攬秀之軒龍吟之堂其南則壽山嵯峨兩峰並峙
列嶂如屏瀑布下入雁池池水清泚連漪鳧雁浮泳
水面棲息石間不可勝計其上亭曰噓噓北直絳霄
樓峰巒崛起千疊萬復不知其幾十里而方廣蕪數
十里其西則參朮杞菊黃精芎藭被山彌塢中號藥
寮又禾麻菽麥黍豆稗秫築室若農家故名西莊上

有亭曰巢雲高出峰岫下視群嶺若在掌上自南徂
北行岡脊兩石間綿亘數里與東山相望水出石口
噴薄飛注如獸面名之曰白龍泝濯龍峽蟠秀練光
跨雲三亭羅漢巖又西畔山間樓曰倚翠青松蔽密
布於前後號萬松嶺上下設兩關出關下平地有大
方沼中有兩洲東為蘆渚亭曰浮陽西為梅渚亭曰
雪浪沼水西流為鳳池東出為研池中分二館東曰
流碧西曰環山館有閣曰巢鳳堂曰三秀以奉九華
玉真安妃聖像東池後結棟山下曰揮雲廳復由磴
道盤行縈曲捫石而上既而山絕路隔繼之以木棧

倚石排空周環曲折有蜀道之難躋攀至介亭此最
高於諸山前列巨石凡三丈許號排衙巧怪巉巖藤
蘿蔓衍若龍若鳳不可殫窮麓雲半山居右極目蕭
森居左北俯景龍江長波遠岸彌十餘里其水流注
山間西行潺湲為漱玉軒又行石間為煉丹亭凝真
觀圖山亭下視水際見高陽酒肆清虛閣北岸萬竹
蒼翠翁鬱仰不見天有勝筠菴躡雲臺蕭閒館飛岑
亭無雜花異木四面皆竹也又支流為山莊為迴溪
自山蹊石罅蹇條下平陸中立而四顧則巖峽洞穴
亭閣樓觀喬木茂草或高或下或遠或近一出入

一榮一彫四面周匝徘徊而仰顧若在重山大壑深
谷幽巖之底不知京邑空曠坦蕩而平夷也又不知
郭郭環會紛萃而填委也真天造地設神謀鬼化非
人力所能為者此舉其梗概焉爾

華陽宮記 政和初天子命作壽山艮嶽於禁城之東
陬詔闡人董其役舟以載石輿以輦土驅散軍萬人
築岡阜高十餘仞增以太湖靈壁之石雄拔峭峙功
奪天造石皆激怒舐觸若踞若齧牙角口鼻首尾爪
距千態萬狀殫竒盡怪輔以蟠木瘦藤雜以黃楊對
青蔭其上又隨其幹旋盤曲之勢斬石開徑憑險則

設磴道飛空則架棧閣仍於絕頂增高榭以冠之搜
遠方珍材盡天下良工絕技而經始焉山之上下致
四方珍禽竒獸動以億計猶以為未也鑿池為溪澗
疊石為隄捍任其石之怪不加斧鑿因其餘土積而
為山山骨競露峰稜如削飄然有雲姿鶴態曰飛來
峯高於雉堞翻若長鯨腰徑百尺植梅萬本曰梅嶺
接其餘岡種丹杏鴨脚曰杏岫又增土疊石間留隙
穴以栽黃楊曰黃楊巘築修岡以植丁香積石其間
從而設險曰丁香嶂又得赭石任其自然增而成山
以椒蘭雜植於其下曰椒崖接衆山之末增土為大

坡從東南植側柏萬數枝幹柔密揉之不斷葉葉結
為幢蓋鸞鶴蛟龍之狀曰龍柏坡循壽山而西移竹
成林復開小徑至百數步竹有同本而異幹者不可
紀極皆四方珍貢又雜以對青竹十居八九曰斑竹
麓又得紫石滑淨如削面徑數仞因而為山貼山卓
立山陰置木櫃絕頂開深池車駕臨幸則驅水工登
其頂開閘注水而為瀑布曰紫石壁又名瀑布屏從
艮嶽之麓琢石為梯石皆溫潤淨滑曰朝真磴又於
洲上植芳木以海棠冠之曰海棠洲壽山之西別治
園囿曰藥寮其宮室臺榭卓然著聞者曰瓊津殿絳

霄樓萼綠華堂築臺高九仞周覽都城近若指顧造
碧虛洞天萬山環之開三洞為品字門以通前後苑
中央建八角亭榭椽窗楹皆以瑪瑙石間之琢其地
為龍礎導景龍江東出安遠門以備龍舟行幸東西
擷景二園西則溯舟造景龍門以幸曲江池亭復自
瀟湘江亭開閘通金波門北幸擷芳園隄外築壘衛
之瀕水蒔絳桃海棠芙蓉垂楊略無隙地又於其旁
作野店麓治農圃開東西二關夾懸崖磴道絕險窄
石多峰稜過者膽戰股栗凡自苑中登群峰所出入
者此二關而已又為勝遊六七曰躍龍澗漾春陂桃

花開雁池迷真洞其餘勝跡不可殫紀工已落成上
名之曰華陽宮然華陽大抵衆山環列就中得平蕪
數十頃以治園囿而闢宮門於西入徑廣於馳道左
右皆大石林立百餘株名曰神運昭功敷慶萬壽峰
獨神運峯廣百圍高六仞錫爵磐固侯居道之中束
石為亭以庇之高五十尺御製記文親灑宸翰碑高
三丈附於石之東南陬其餘衆石或若群臣入侍帷
幄正容凜然不可犯或戰栗若敬天威或儼然而立
或奮然而起或翼然超群或竦然危峙或若偃僂趨
進布危言以示庭諍之姿其怪狀餘態娛人者多矣

上既悅之悉與賜號守吏以奎章畫刻於石之陽其
他軒榭庭徑各有巨石棋列星布並與賜名惟神運
峯前巨石以金飾其字餘皆青黛而已此所以第其
甲乙者也乃命群峰其略曰朝日昇龍望雲坐龍矯
首玉龍萬壽老松栖霞捫參銜日吐月排雲衝斗雷
門月窟蹲螭坐獅堆青凝碧金鼈玉龜疊翠獨秀棲
烟繚雲風門雷穴玉秀玉竇銳雲巢鳳跼龍雕琢渾
成登封日觀蓬瀛須彌老人壽星卿雲瑞靄溜玉噴
玉蘊玉琢玉積玉疊玉叢秀而在於渚者曰翔鱗立
於渚者曰舞仙獨踞洲中者曰玉麒麟冠於壽山者

曰南屏小峯附於池上者曰伏犀怒猊儀鳳烏龍立於沃泉者曰留雲宿霧又為藏烟谷滴翠巖搏雲屏積雪嶺其間黃石仆於亭際者曰抱犢天門又有大石二枚配神運峰異其居以壓衆石作亭庇之置於寰春堂者曰玉京獨秀太平巖置於萼綠華堂者曰卿雲萬態竒峰括天下之美藏古今之勝於斯盡矣靖康元年閏十一月大梁陷都人相與排墻避兵於壽山艮嶽之巔時大雪新霽邱壑林塘粲若畫本凡天下之美古今之勝在焉祖秀周覽累日咨嗟驚愕信天下之傑觀而天造有所未盡也明年春復遊華

陽宮而民廢之矣元老大臣所以圖書詩頌名記人厭之悉斧其碑委諸溝中至於華木竹箭宮室臺榭尋為民所薪同宇宙而長存獨壽山艮嶽以耳目之眩蔽堯舜之明為王者一尤物耳昔三代以嬖色取禍秦隋以奢靡致失自書傳之作聖賢莫不以斯二者為先誠也自我藝祖以上聖之資定區宇既克孟昶閱宮中物有寶裝溺器遽命碎之平劉鋹廢媚川却速禁采珠蓋奢侈者禍之媒槩創業之君所諱也於虜富有天下美味珍服莫敢以資其身雖土階三尺茅茨不翦亦知其可也崇寧之際恭默求治是時

非無賢能也而蔡氏先據要途祖宗之法去民久矣自是崇大苑囿結怨四國皆出於此不然一夫不臣天下族之彼外患安得而內侮之耶噫天下之士聞壽山艮嶽者舊矣孰親觀其興廢復使後世憑何圖記以考之與因括其大略作華陽宮記云

艮嶽記略 徽宗登極之初皇嗣未廣有方士言京城東北隅地協堪輿但形勢稍下倘少增高之則皇嗣繁衍矣上遂命土培其岡阜使稍加於舊而果有多男之應自後海內乂安朝廷無事上頗留意苑囿政和間遂即其地大興工役築山號壽山艮嶽命宦者

梁師成專董其事時有朱勔者取浙中珍異花木竹石以進號曰花石綱專置應奉局於平江所費動以億萬計調民搜巖剔藪幽隱不置一花一木曾經黃封護視稍不謹則加之以罪斲山輦石雖江湖不測之淵力不可致者百計以出之至名曰神運舟楫相繼日夜不絕廣濟卒四指揮盡以充輓士猶不給時東南監司郡守二廣市舶率有應奉又有不待旨但進物至都計會宦者以獻者大率靈璧太湖諸石二浙竒竹異花登萊文石湖湘文竹四川佳果異木之屬皆越海渡江毀橋梁鑿城郭而至植之皆生而異

宋東坡志林 卷之十七 十一
味珍苞則以健步捷走雖甚遠數日即達色香未變也後上亦知其擾稍加禁戢獨許朱勔及蔡攸入貢竭府庫之積聚萃天下之技藝凡六載而始成亦呼為萬歲山奇花美木珍禽異獸莫不畢集飛樓傑觀雄偉瓌麗極於此矣越十年金兵至汴大雪盈尺詔令民任便斫伐為薪是日百姓奔往無慮千萬人臺榭宮室悉皆拆毀官不能禁也予頃讀國史及諸傳記得其始末如此

楓窻小牘 艮嶽周迴十餘里其最高一峯九十步上有介亭分東西二嶺直接南山山之東有萼綠華堂

家大夫承命作頌曰玉皇御天金母嫁女瑤辭成車裁瑛作塵龍馭崑邱鳥發玄圃笑月光微看雲色阻荷露添華柳烟生嫵九重歡眷六宮遜處乃構椒房用當金宇碌碌宜階瑟瑟為戶碧落森沉青霞墉堵小臣獻頌庶叶萬舞

容齋三筆 萬歲山周十餘里最高一峯九十步亭堂樓館不可殫紀徽宗初亦喜之已而悟其過有厭惡語由是力役稍息靖康金兵圍汴詔取山禽水鳥十餘萬投諸汴渠拆屋為薪鑿石為砲伐竹為笆籬大鹿數千頭悉殺之以噉衛士

容齋續筆 宣和間朱勔挾艮嶽花石之名以固寵利
東南部使者郡守多出其門如徐鑄應安道王仲閎
輩共濟其惡豪奪漁取毛髮不償士民家一石一木
稍堪翫者即令健卒直入其家用黃封表識拊為御
物或未即取而護視微不謹則重譴隨之及發行必
撤屋抉墻而出人或有一物小異即共指為不祥惟
恐芟夷之不速楊戩李彥創汝州西城所任輝彥李
士渙王澣毛孝立之徒亦助之發物供奉大抵類勔
而又有甚焉者徽宗患其擾屢禁止之然復出為惡
不能絕也

五侯鯖 艮嶽初成令近山多造油絹囊以水濕之曉
張於絕巘危巒之間既而雲盡入焉遂括囊以獻名
曰貢雲每車駕所臨則盡縱之須臾滃然充塞如在
千巖萬壑間

程史 艮嶽初建諸巨璫爭出新意謂土木既宏麗矣
獨念四方所貢珍禽之在籞者不能盡馴有市人薛
翁素以豢擾為優場戲請於童貫願役其間許之乃
日集輿衛鳴蹕張黃屋以遊至則以巨柈貯肉炙梁
米翁傲禽鳴以致其類既乃飽飫翔泳聽其去來月
餘而在籞者四集不假鳴而致益狎玩立鞭扇間不

復畏矣遂自命局曰來儀所招四方籠畜者置官司以總之一日徽宗臨幸遠聞清道聲望而群翔者數萬馬翁輒先以牙牌奏道左曰萬歲山瑞禽迎駕上大喜命以官賚予加厚靖康圍城之際有詔許捕馴籞者皆不去民徒手得之以充餐云

癸辛雜識 前代累石為山未見顯著至宣和間艮嶽之役興連轡輦致不遺餘力其大峯偉秀者不特侯封或賜金帶且各圖為譜然工人皆出於吳興謂之山匠蓋吳興北連洞庭多產花石而弁山所出類亦秀竒故四方之為山者率於此中取之嘗聞汴京父

老云艮嶽之取石也其大而穿透者致遠必有損折之慮乃先以膠泥實填衆竅外復以麻筋雜泥裹之令圓混日曬極堅實始用大木為車致於舟中直俟抵京然後浸之水中旋去泥土則省人力而無他慮此法竒甚前所未聞也

愚見紀忘 艮嶽舊址無存久矣問之皆曰三山兒坡是也其誤甚矣考之宋史徽宗於宮城東北起景龍門複道禁中每歲放燈自東華門以北並不禁夜又於次東建寶籙宮後累石為山以其在艮方也號艮嶽又稱壽嶽夢華錄云京城北辟其門有三從東曰

舊封邱門中曰景龍門乃大內城東角寶籙宮前也
次西曰金水門近見汴之城池沿革一帙云北面三
門中曰景龍門太平興國改今名俗名酸棗門東曰
安遠門俗名舊封邱門西曰天波門又號太安門至
正間汴人拒守不及遂築塞諸門止留五門然徽宗
命侍郎孟揆於上清寶籙宮東築山以象餘杭之鳳
凰山周迴十餘里其最高一峯九十步上有介亭其
艮嶽的在宮城東北景龍門內以東之地明矣後金
宣宗命尚書木虎高琪展築汴城就取艮嶽之土般
築以為北面城垣其景龍江改為城濠諸池沼悉皆
填平止有龍德宮前土嶺猶在俗名三山兒坡若以
為艮嶽遺址實為大謬龍德宮徽宗潛邸也在景龍
門西離寶籙宮遠矣

雲烟過眼錄 錦川石長五丈餘蓋在宣和後苑門所
謂艮嶽前河梁也石色紫碧相間皆成文理近世罕
得

清溪寇軌 徽廟繼統蔡京父子欲固其位乃倡豐亨
豫大之說以恣蠱惑童貫遂開造作局於蘇杭以製
御器又引吳人朱勳進花石媚上上心既侈歲加增
焉舳舻相銜於淮汴號花石綱至截諸道糧運綱旁

羅商舟楫所貢暴其上連檣接櫓日夜不絕篙工柁師倚勢貪橫凌轢州縣道路以目其尤重者漕河弗能運則取道於海江南數十郡深山幽谷搜剔殆遍或有奇石在江湖不測之淵百計取之必得乃止程限慘刻無間寒暑預是役者多鬻田宅子女以供其須焉

農田餘話 汴京艮嶽元朝嘗有田田人於內取雄黃數千觔爐甘石數萬觔蓋雄黃築於巖穴地道間可以辟蛇虺爐甘石雨過之後日炙之則有濕氣蒸蒸然以象嵐霧故於中築二物焉

異物彙苑 政和間靈壁縣貢一巨石高二丈餘周圍稱是舟載至京師毀水門樓以入千夫舁之不動或奏云此神物也宜表異之上親灑宸翰云卿雲萬態竒峯仍以金帶一條掛其上即遂可移省夫之半頃刻至苑中

宋稗類鈔 林靈素開講於寶籙宮一道者怒目立於前靈素問爾何能道者曰無所能靈素曰無所能何以在此道者曰先生無所不能何以在此徽宗異之宣問實有何能道者對曰臣能生養萬物遂下道院取可以有種者得苗香一掬命道者種於艮嶽之趾

仍遣衛監送於道院中是夜三鼓失所在翼日視艮嶽苗香已成林矣

宋史筆斷 初朱勔因蔡京以進上頗垂意花石勔初致黃楊三四本上已嘉之後歲歲增加遂至舟船相繼號曰花石綱專置應奉局於平江每一發輒數十百萬故花石至京師者一花費數千緡一石費數萬緡此花石綱之始也既而作萬歲山運四方花竹奇石積累二十餘年山林高深千巖萬壑麋鹿成群樓觀臺殿不可勝紀此花石綱之中也又令苑囿為白屋不施五采多為村居野店之景及聚珍禽異獸以

實其中每秋風夜靜禽獸之聲四徹宛若山林陂澤間識者以為不祥之兆此花石綱之末也徽宗於是盡棄國政乃與蔡京等酣歌達旦以燕以遊將為終身之樂焉故太學生鄧肅進詩諷諫備述花石之擾其末句云但願君王安萬姓圃中何日不東風詔屏逐之至於舟兵苦之群聚為盜方臘稱亂浙土騷然然後罷花石綱使般運糧道於時雖有罷之之名而實無絕之之意蓋冀盜息而即復之耳

堯山堂外紀 邢俊臣性滑稽喜嘲咏常出入禁中善作臨江仙詞末章必用唐律兩句為謔以寓調笑徽

宗置花石綱石之大者曰神運石大舟排聯數十尾
僅能勝載既至上大喜置艮嶽萬歲山命俊臣為臨
江仙詞以高字為韻末句云巍峩萬丈與天高物輕
人意重千里送鵝毛又令賦陳朝檜以陳字為韻檜
亦高五六丈圍九尺餘枝覆蔭幾百步詞末云遠來
猶自憶梁陳江南無好物聊贈一枝春上客之弗怒
書蕉 艮嶽八芳曰金蛾玉羞虎耳鳳尾素馨渠那茉莉含笑

妙貫堂餘譚 泊宅編紀崇觀以來天下珍異悉歸禁
中四方梯航殆無虛日大則寵以爵祿其次錫賚稱

是宣和五年平江府朱勗造巨艦載太湖石一塊至
京鑿城壞橋以千人舁進是日役夫各賜銀碗并官
其四僕皆承節郎及金帶勗遂為威遠節度使而封
石為磐固侯鹽官縣安國寺雙檜唐師悟空手植勗
亦遣使臣李綱取以供進大者由海道舟遇風濤檜
皆碎折小者自漕路入既獻綱轉二官知縣鮑慎好
賜緋論者謂石雖大不能鎮四海之安檜雖古不能
延八方之命貴此何用而竭民力費貲財至以官賞
下逮輿臺滅獲而取之耶名器濫而進奉繁宋德之
所以頽衰也書曰不寶遠物又曰所寶惟賢有國家

者曷其念諸

宋東京考卷之十七 全

宋東京考卷之十八

嘉興石匏周 城緝

河渠

黃河 按物理論河色黃衆川之流蓋濁之也

按宋史河渠志河入中國自太行西曲折山間不能為大患既出大伾東走赴海更平地二千餘里禹迹既湮河并為一特以隄防為之限夏秋霖潦百川奔會不免決溢之憂然有司所以備河者亦益工矣自周顯德初河決東平之楊劉宰相李穀監治隄防水患少息然決河不復故道離而為赤河乾德二年遣使按行將治古

隄議者以舊河不可卒復力役且大遂止但詔民治遙
隄以禦衝注之患五年正月帝以河隄屢決遣使行視
發畿甸丁夫繕治自是歲以為常皆以正月首事季春
而畢是月詔開封府大名府鄆澶滑孟濮齊淄滄棣濱
德博懷衛鄭等州長吏並兼本州河隄使蓋以謹力役
而重水患也開寶四年十一月河決澶淵泛數州官守
不時上言通判司封郎中姚恕棄市知州杜審肇坐免
五年正月詔曰應緣黃汴清禦等河州縣除準舊制種
藝桑棗外委長吏課民別樹榆柳及土地所宜之木仍
按戶籍高下定為五等第一等歲樹五十本第二等以
下遞減十本民欲廣樹藝者聽其孤寡惻獨者免是月
澶州修河卒賜以錢鞵役夫給以茶三月詔曰朕每念
河渠潰決頗為民患故署使職以總領焉宜委官聯佐
治其事自今開封等十七州府各置河隄判官一員以
本州通判充如通判闕員即以本州官充五月河大決
濮陽又決陽武詔發諸州兵及丁夫凡五萬人遣潁州
團練使曹翰護其役翰辭帝謂曰霖雨不止又聞河決
朕信宿以來焚香上禱於天若天災流行願在朕躬勿
延於民也翰頓首對曰昔宋景公諸侯耳一發善言災
星退舍今陛下憂及兆庶懇禱如是固當上感天心必

不為災六月詔曰近者澶濮等數州霖雨洊降洪河為
患朕以屢經決溢重困黎元每閱前書詳究經瀆至若
夏后所載但言導河至海隨山濬川未聞力制湍流廣
營高岸自戰國專利湮塞故道小以妨大私而害公九
河之制遂隳歷代之患弗弭凡縉紳多士草澤之倫有
素習河渠之書深知疏導之策若為經久可免重勞並
許詣闕上書附驛條奏朕當親覽用其所長勉副詢求
當示甄獎時東魯逸人田吉者纂禹元經十二篇帝聞
之召至闕下詢以治水之道善其言將授以官以親老
固辭歸養從之翰至河上親督工徒未幾決河皆塞是

後又決屢命樞密直學士張齊賢翰林學士宋白乘傳
祭白馬津沈以太牢加餼而黃河之患終宋之世迄無
寧歲瀕河之民田廬荒圯役調孔亟可謂困苦之甚也
已

退朝錄 唐時黃河不聞有決溢之患唐書惟載薛平
為鄭滑節度使始河溢瓠子東泛滑距城纔二里許
平按求故道出黎陽西南因命其從事裴弘泰往請
魏博節度使田弘正弘正許之乃籍民田所當者易
以他地疏導二十里以殺水悍還墾田七百頃於河
南自是滑人無患此外無所紀蓋河朔地天寶後久

屬藩臣而事不聞朝廷也

水議 古者舜命益作虞以掌山澤周有川澤之禁而後世修之未嘗廢也由秦漢以來使任其事而為之水官則莫若都水之職其主灌溉陂池保守河渠自太常及三輔皆任其官至武帝時尤增重之於是又有左右使者使統其任而居其事者莫不明於禹貢之學而習於知水之性故劉向以治書為三輔都水都尉平當以明禹貢領護河隄是以秦漢之際言水事於書尤著而魏晉以來至於隋唐其官亦未嘗廢於魏則有都尉水衡之號晉宋齊皆曰都水臺或為

水衡令及梁天監中始改曰大舟卿主治舟航河隄隋唐之時又皆為都水使者或改曰監而舟楫河渠二署隸之然於水事或領或否矣

資治通鑑 自開直河水勢增漲田廬益壞熙寧十年七月大決於澶州曹村北流斷絕河道南徙東匯於梁山張澤灤分為二派一合南清河入於淮一合北清河入於海凡灌郡縣四十五而濮齊鄆徐尤甚壞田逾三十萬頃遣使修閉判大名府文彥博言河勢變移四散漫流兩岸俱被水患而都水止固護東流北岸希省費之賞未嘗增修隄岸今者之決溢非天

災實人力不至也逾年決口塞詔改曹村埽曰靈平
徽宗時都水使者趙霆得兩首龜於黃河獻以為瑞
蔡京曰此齊小白所謂象罔見之而霸者也鄭居中
言首豈有二人皆駭異而京獨主之殆不可測帝命
棄龜於金明池

治河通考 古自陽武北新鄉西南入境東北經延津
汲胙城至北直隸濬縣大伾山北入海即禹貢導河
東過洛汭至於大伾據地志魏郡鄴縣有故大河在
東北直達於海疑即禹之故河也周定王五年河徙
則非禹之所穿漢文帝十二年河決酸棗東南流經

封邱入北直隸長垣縣界至山東東昌府濮州張秋
入海五代至宋兩決鄭州及原武東南陽武南流經
封邱于家店祥符金龍口陳橋北經蘭陽儀封入山
東曹縣境分為二派其一東南流至徐州入泗其一
東北流合會通河國朝洪武七年至十八年二十四
年陽武原武祥符凡四度滄沒護城隄又決陽武西
南東南流經封邱陡門祥符東南草店村經府城北
五里東過焦橋南過蘇村至通許西南分九道名九
龍口又南至扶溝太康陳項城諸州縣境入南直隸
太和縣合淮正統十三年河溢仍循陽武故道直抵

張秋入海今皆淤為平地其自滎陽築隄至千乘海口千餘里名金隄自河內北至黎陽為石隄激使東抵東郡為平岡西北抵黎陽觀下東北抵東郡津北西北至魏郡昭陽又自汲縣築隄東接胙城抵直隸滑縣界西接新鄉獲嘉縣界東南接延津縣界名護河隄在滎陽東南二十里中牟東北境名官渡即曹操與袁紹分兵相拒處築城築臺皆名官渡在汲縣東南境名延津置關亦名延津又置關名金隄在新鄉南境有八柳渡皆因河徙而廢

丹鉛總錄 宋太祖曰夏后治水但言導河至海隨山

濬川未聞力制湍流廣營高岸自戰國專利堙塞故道以小妨大以私害公九河之制遂隳歷代之患弗弭神宗曰後世以事治水故常有礙以道治水無違其性可也如能順水所向遷徙城邑以避之復有何患雖禹復生不過如此歐陽修曰開河如放火河決為失火又曰避高就下水之本性河流已棄之道自古難復文彥博曰河不出於東則出於西利害一也今發夫修治徙東從西何利之有自古治河之說多矣若宋二帝之見二臣之言可為百世法

水衡記 黃河水隨月異名正月解凍名凌解水五月

瓜延蔓名瓜蔓水六月名礬山水十一二月名感凌水冰斷復結感起成層也

歲時廣記 黃河水二月三月名桃花水顏師古漢書音義云月令仲春之月始雨水桃始華蓋桃方華時既有雨水川谷漲泮衆流盛長故謂之桃花水老杜詩云春岸桃花水又云三月桃花浪注曰峽以二月桃花發時春水生謂之桃花水王摩詰詩云春來到處桃花水歐陽公詩云桃花水下清明路五月名瓜蔓水瓜正蔓也東坡詩云河水渺綿瓜蔓流

續文獻通考

按當時黃河隨時漲落故舉物候為水

勢之名自立春後東風解凍河邊人候水初至凡一寸則夏秋當至一尺頗為信驗故謂之信水二月三月桃花始開冰泮雨積川流猥集波瀾盛長謂之桃花水春末蕪菁花開謂之菜花水四月末隴麥結秀擢芒變色謂之麥黃水五月瓜實延蔓謂之瓜蔓水朔野之地深山窮谷固陰沍寒冰堅晚泮逮乎盛夏消釋方盡而沃蕩山石水帶礬腥併流於河故六月中旬後謂之礬山水七月菽豆方秀謂之豆華水八月莢亂花謂之荻苗水九月以重陽紀節謂之登高水十月水落安流復其故道謂之復槽水十一月十

二月斷冰雜流乘寒復結謂之感凌水水信有常率以為準非時暴漲謂之客水其水勢凡移礧橫注岸如刺毀謂之剗岸漲溢踰防謂之抹岸埽岸故朽潛流漱其下謂之塌岸浪勢旋激岸土上墮謂之淪捲水侵岸逆漲謂之上展順漲謂之下展或水乍落直流之中忽屈曲橫射謂之經窳水猛驟移其將澄處望之明白謂之拽白亦謂之明灘湍怒略渟勢稍汨起行舟值之多溺謂之薦浪水退淤澱夏則膠土肥腴初秋則黃滅土頗為疏壤深秋則白滅土霜降後皆沙也舊制歲虞河決有司常以孟秋預調築塞

之物稍芟薪柴楛櫛竹石芟索竹索千餘萬謂之春料詔瀕河諸州所產之地仍遣使會河渠官吏乘農隙率丁夫水工收采備用凡伐蘆荻謂之芟伐山木榆柳枝葉謂之稍辦竹糾芟為索以竹為巨索長十尺至百尺有數等先擇寬平之所為埽場埽之制密布芟索鋪稍稍芟相重壓之以土雜以碎石以巨竹索橫貫其中謂之心索卷而束之復以大芟索繫其兩端別以竹索自內旁出其高至數丈其長倍之凡用丁夫數百或千人雜唱齊挽積置於卑薄之處謂之埽岸既下以櫪臬闔之復以長木貫之其竹索皆

埋巨木於岸以維之遇河之橫決則復增之以補其缺凡埽下非積數叠亦不能遏其迅湍又有馬頭鋸牙木岸者皆以感水勢護隄焉

祥符縣志 黃河應天漢而出崑崙禹導之自磧石歷龍門至華陰始入於中土其勢汎漲激潰不可測制古今以神目之禹時入北海至周徙於南故道寔失而宋元以來入於淮今去汴城四十餘里自西北汜水縣入境東至虞城縣下達山東濟寧州界洪武二十年河決汴城自安遠門入滄沒官民廨宇甚衆二十四年河決原武縣黑陽山下東南流經汴城東北

五里遂成大河下達於淮而故道遂淤洪武三十二年復決衝塌土城水從封邱門流入裏城官廨民廬滄沒傾圮而城內之水久積不涸永樂九年乃於城之西北三十里自大河北岸復開新河導其水於中灤東入黃河故道正統十三年河溢仍循陽武故道直抵張秋入海歷歲滋久今皆淤為平地矣天順五年復決衝入汴城宗藩皆避水隣邑而官民悉移居城上以俟水消自是之後隄防有法黃河不入汴城百有餘年矣

日知錄 黃河載之禹貢東過洛汭至於大伾北過泲

水至於大陸又北播為九河同為逆河入於海者其故道也漢元光中河決瓠子東南注鉅野通於淮泗武帝自臨發卒數萬人塞之築宮其上名曰宣防導河北行復禹舊跡而梁楚之地復寧無水災自漢至唐河不為害幾及千年五代史晉開運元年五月丙辰滑州河決侵汴曹濮單鄆五州之境環梁山合於汶水與南旺蜀山湖連瀰漫數百里河乃自北而東宋史熙寧十年七月乙丑河大決於澶州曹村北流斷絕河道南徙東匯於梁山張澤灤分為二派一合南清河入於淮一合北清河入於海河又自東而南

矣元豐以後又決而北議者欲復禹迹而大臣力主回東之議降及金元其勢日趨於南而不可挽故今之河非古之河矣自中牟以下奪汴徐州以下奪泗清口以下奪淮凡三奪而後注於海今歲久河身日高淮泗又不能容矣

汴河

按汴京遺蹟志汴河在今縣治南三十五步即浚儀渠也源出滎陽大周山合京索須鄭四水東經京城內合蔡河名菘水經注作菘一作浪蕩渠又名通濟渠自隋大業初疏通濟渠引黃河通淮至唐改名廣濟渠宋都大梁諸水

莫此為重其淺深有度置官以司之都水監總察之每
歲自春及冬常於河口均調水勢止深六尺以通行重
載為準歲漕運江淮湖浙米數百萬及運東南之產百
物衆寶不可勝計又下西山之薪炭內外仰給焉然大
河向背不常故河口屢易易則度地形相水勢為口以
逆之遇春首輒調數州之民勞費不貲役者多溺死吏
又侵漁為奸而京師常有決溢之虞建隆三年十月詔
緣河州縣長吏常以春首課民夾岸植榆柳以固隄防
淳化二年六月汴水決浚儀縣帝乘步輦出乾元門宰
相樞密迎謁帝曰東京養甲兵數十萬居人百萬家天

下轉漕仰給在此一渠水朕安得不顧車駕入泥渚中
行百餘步從臣震恐殿前都指揮使戴興叩頭懇請回
馭遂捧輦出泥渚中詔興督步卒數千塞之日未盱水
勢稍定帝始就次大官進膳親王近臣皆泥渚沾衣知
縣宋炎亡匿不敢出特赦其罪至道元年九月詔問侍
臣汴水疏鑿之由令參知政事張洎講求其事以聞後
元世祖至元二十七年河決祥符之義唐灣自汴城迤
東至陳留杞縣汴河及隄皆為所淤而水入蔡河洪武
二十四年黃河改徙而蔡河亦淤塞矣今省城延慶觀
前有小甃橋汴渠故蹟微存俗名臭河兒

水經注 大禹塞滎澤開之以通淮泗即經所謂蕩蕩渠也漢平帝之世河汴決壞未及得修汴渠東侵日月彌廣門閭故處皆在水中明帝永平十二年議治汴渠上乃引樂浪人王景問理水形便景陳利害應對敏捷帝善之乃賜山海經河渠書禹貢圖及以錢帛後作隄發卒數十萬詔景與將作謁者王昊漢書作吳治渠防築隄修塌起自滎陽東至千乘海口千有餘里景乃商度地勢鑿山開澗防過衝要疏決壅積十里立一水門令更相洄注無復潰漏之患役費以百億計明年夏渠成帝親巡行詔濱河郡國置河隄員

吏如西京舊制景由是顯名王昊及諸從事者皆增秩一等順帝陽嘉二年又自汴河口以東緣積石為堰通古淮口曰金隄靈帝建寧中又增修石門以遏渠口水盛則通注津耗則輟流

汴水出陰溝於浚儀縣北注陰溝即蕩蕩渠也汴受旃然水丹沁亂流於武德絕河南入滎陽合汴故蕪丹水之稱河沛水斷汴承旃然而東自王賁灌大梁水出縣南而不逕其北夏水洪汎則是瀆津通故渠即陰溝也於大梁北又曰浚水矣故陳留風俗傳云浚水逕其北者也按水經陰溝水出河南陽武縣蕩渠東南至沛為過水又東南至

下邳淮陵
縣入於淮

地形志 汴水在大梁城東分為蔡渠

張洎集 禹導河自積石至龍門南至華陰東至砥柱
又東至於孟津東過洛汭至於大伾即今成皋是也
或云黎陽山也禹以大河流泛中國為害最甚乃於
貝邱疏二渠以分水勢一渠自舞陽縣東引入漯水
其水東北流至千乘縣入海即今黃河是也一渠疏
畎引傍西山以東北形高敞環隄水勢不便流溢夾
右碣石入於渤海書所謂北過泲水至於大陸泲水
即濁漳大陸則邢州鉅鹿澤播為九河同為逆河入

於海河自魏郡貴鄉縣界分為九道下至滄州今為
一河言逆河者謂與河水往復相承受也齊桓公塞
以廣田居惟一河存焉今其東界至莽梧河是也禹
又於滎澤下分大河為陰溝引注東南以通淮泗至
大梁浚儀縣西北復分為二渠一渠東經陽武縣中
牟臺下為官渡水一渠始皇疏鑿以灌魏郡謂之鴻
溝葭蕩渠出自滎陽五池口其鴻溝即出河之溝亦
曰葭蕩渠漢明帝時樂浪人王景謁者王吳始作浚
儀渠蓋循河溝故瀆也渠成流注浚儀故以浚儀為
名靈帝建寧四年於敖城西北疊石為門以遏渠口

故世謂之石門渠渠水東合濟水濟與河渠渾濤東注至敖山之北又兼邲之水即春秋晉楚戰於邲邲又音汭即汴字古人避反字改從汴渠水又東經滎陽北而旃然水自縣東流入汴水鄭州滎陽縣西二十里三皇山上有二廣武城二城相去百餘步汴水自兩城間小澗中東流而出而濟流自茲乃絕惟汴渠首受旃然水謂之鴻渠東晉義熙十三年劉裕西征姚秦復浚此渠始有湍流奔注兩岸善潰塞裕更疏鑿而漕運焉隋大業三年詔尚書左丞皇甫誼發河南丁夫百萬開汴水起滎澤入淮千餘里為通濟渠唐初改通濟渠為廣濟渠開元末河南採訪使齊澣以江淮漕運經淮水有波濤沉損遂浚廣濟渠下流自泗州虹縣至楚州淮陰縣北八十里合於淮既而水流迅急行旅艱險尋乃廢停却由舊河德宗朝歲漕運江淮米四十萬石以益關中時叛將李正己田悅皆分軍守徐州臨渦口梁宗義阻兵襄鄧南北漕引皆絕於是水陸運使杜佑請改漕路自浚儀西十里疏其南涯引流入琵琶溝經蔡河至陳州合潁水是秦漢故道以官漕久不由此故填淤不通若畎流培岸則功用甚寡不復經泝淮之險朝議將行而

徐州順命淮路乃通至國家膺圖受命以大梁四方所湊天下之樞可以臨制四海故卜京邑而定都惟汴水橫亘國中首承大河漕引江湖利盡南海半天下之財賦并山澤之百貨悉由此路而進

斐然集 世言隋煬帝開汴渠以幸揚州文士考禹貢言堯都冀州居河下流而入都貢賦重於用民力故每州必記入河之水獨淮與河無相通之道求之故迹而不得乃疑汴水自禹以來有之不起於隋世既久遠或名鴻溝或名官渡或名汴渠大概皆自河入淮故淮可引江湖之舟以達於冀也今據後漢書則

平帝時已有汴渠曰河汴決壞則謂輸受之所也至是發卒數十萬修渠隄則平地起兩岸而汴水行其中也十里立一水門更相洄注則以節制上流恐河溢為患也是正與今之汴渠制度無異特未有導洛之事耳史曰渠隄自滎陽而東則上疑其為鴻溝下疑其為官渡者恐未得其要官渡直黃河也故袁曹相拒沮授曰悠悠黃河吾其濟乎汴渠自西而東鴻溝乃橫亘南北故曰未得其要也獨所謂自禹以來有汴者此則不易之論也

夢溪筆談

國朝汴渠發京畿輔郡三十餘縣夫歲一

浚祥符中閤門祇候使臣謝德權領治京畿溝洫權借浚汴夫自是後三歲一浚始令京畿民官皆兼溝洫河道以為常職久之治溝洫之工漸弛邑官徒帶空名而汴渠有二十年不浚歲歲堙澱異時京師溝渠之水皆入汴舊尚書省都堂壁記云疏治入渠南入汴水是也自汴流堙澱京城東水門下至雍邱襄邑河底皆高出隄外平地一丈二尺餘自汴隄下瞰民居如在深谷熙寧中議改疏洛水入汴余嘗因出使按行汴渠自京師上善門量至泗州淮口凡八百四十里一百三十步京師地勢比泗州凡高十九丈四尺八寸六分於京城東數里白渠中穿井至三丈方見舊底驗量地勢用水平望之幹尺量之不能無小差汴渠隄外皆是出土故溝水令相通時為一堰節其水候水平其上漸淺涸則又為一堰相齒如階陛乃量堰之上下水面相高下之數會之乃得地勢高下之實

沂公筆錄 汴渠派分洪河自唐迄今皆以為莫大之利然迹其事實抑有深害何哉凡梁宋之地畎澮之利湊流此渠以成其大至隋煬帝將幸江都遂析黃河之流築左右隄三百餘里舊所湊水悉為橫絕散

漫無所故宋亳之地遂成沮洳卑濕且昔之安流今乃湍悍覆舟之患十有三二昔之漕運冬夏無限今則春開秋閉歲中漕運止得半載昔之泝沿兩無艱阻今則逆流而上乃重載而行其為難也甚矣沿流而下即虛舟而往其為利也背矣矧自天子建都而汴水貫都東下每歲霖澍決溢為慮由斯觀之其利安在然歷世浸遠詎可卒圖異日明哲之士開悟積惑言復曩迹始信茲言之不謬也

退朝錄 唐時汴河不聞有疏通之事惟鄭畋集載為相時汴河淀塞請令河陽節度使於汴口開導仍令宣武感化節度使嚴帖州縣封閉公私斗門感化即徐州也

開寶八年十一月江南平留汴水以待李國主舟行盛寒河流淺涸詔所在為埧閘瀦水以過舟官吏擊凍督役稍稽則皆何校甚者劾臯以次被罰州縣官降勅而杖之者凡十餘人

東齋記 錢俶進犀帶於太祖太祖卻之曰朕有三條帶與此不同俶求宣示太祖笑曰汴河一條惠民河一條五大河一條俶大愧服

蒲日廿九日閱

真

宋東京考卷之十八 今

宋東京考卷之十九

嘉興石匏周 城緝

河渠

汴河

談圃 隋開汴河其勢正衝今南京至城外迂其勢以避之古老相傳為留趙灣至藝祖以宋州節度使即帝位乃其識也

玉壺清話 周顯德中遣周景大濬汴口景知汴口既濬舟楫無壅將有淮浙巨商糧斛萬貨臨汴無委泊之地諷世宗乞令許京城民環汴栽榆柳起臺榭以

為都會之壯上許之景踞汴流中起巨樓十二間方
運斤上輦輅過因問之知景所造頗喜賜酒犒其工
不悟其規利也景後邀巨貨於樓山積波委歲入數
萬計云其贖貨罔上如此

文獻通考 神宗熙寧十年提舉汴河隄岸司言京東
地富穀粟可以漕運但以河水淺澁不能通舟近修
京東河岸開斗門通廣濟河為利甚大今請通津門
裏汴河岸東城裏三十步內開河一道及置斗門上
安水磨下通廣濟河應接行運從之

聞見近錄 汴河舊底有石板石人以記其地里每歲

興夫開導至石板石人以為則歲有常役民未嘗病
之而水行地中京師內外有八水口泄水入汴故京
師雖大雨無復水患昔人之畫善矣偶張君平論京
畿南京宿亳陳潁蔡等州積水以南京言之自南門
二隄直抵東西二橋左右皆瀦澤也漁舠鳴榔如江
湖君平請權借汴夫三年通泄積水於是諸郡守令
等始帶溝洫河道三年而奏功凡瀦積之地悉為良
田自是汴河夫借充他役而不復開導至元祐五年
實七十年又舊河並以木岸後人止用土筏棧子謂
之外添裏補河身奔脫即外補之故河日加淺而水

行地上矣

南京去汴河五里河次謂之河市五代國初官府罕至舟車所聚四方商賈孔道也其盛非宋州比凡群有晏設必召河市樂人故至今俳優曰河市樂人者由此也

止齋集 本朝定都於汴漕運之法分為四路江南淮南浙東西荆湖南北六路之粟自淮入汴至京師陝西之粟自三門白波轉黃河入汴至京師陳蔡之粟自閔河蔡河入汴至京師京東之粟自五丈河歷陳濟及鄆至京師四河所運惟汴河為最重

揮塵後錄 汴水湍急失足者隨流而下不可復活舊有短垣以限往來久而傾圮民佃以為浮屋元祐中方達源為御史建言乞重修短垣護其隄岸疏入報可遂免滄溺之患

東都事略 徽宗時京師大水汴且溢或請決汴水南岸以護宮城者戶部侍郎唐恪曰水漲而決是無可奈何今決而浸之是棄民也乃止恪泛小舟歷覽水之源委而求所以利導之乃決金隄導而注之河踰甸而水平

兩山墨談 宿州至靈璧縣循古岸而行問之乃汴隄

下即汴河也煬帝鑿此以幸江都世代變遷故道湮塞宋濬之以通運餉而東南舟車之赴汴京者必由於此米芾所謂船頭出浪翠屏間蓋指此河也今歲久復湮且種藝成畝矣隄間多卧古峯石空嵌秀溜蒼翠可掬亦有甚大者相傳謂宋營良嶽取石於靈壁網運未訖而汴都被兵遂棄於此千載尤物撫之可勝浩歎云

一統志 汴河舊自滎陽縣東經汴城內又東合蔡河名葭菖渠又名通濟渠東注泗州下入於淮累因河決其蔡河湮沒無跡而汴河自汴城中牟縣入黃河

矣

蔡河

按祥符縣志蔡河舊在縣南九十里貫注汴城為都人所仰兼閔水洧水湫水以通舟楫閔水自尉氏歷祥符合於蔡是為惠民河洧水自許田注鄆陵東南歷扶溝合於蔡湫水出鄭之大隗山注臨潁歷鄆陵扶溝合於蔡凡許鄭諸水悉會焉猶以其淺涸故植木橫棧為水之節啟閉以時建隆二年命中使浚蔡河設斗門節水自京師距通許鎮三年詔發畿甸陳許丁夫數萬疏浚南入潁川其自尉氏北流至汴京戴樓門東由廣利水

門入城名西蔡河接閔水繚繞城內其從陳州門西普濟水門出城流經通許鎮復接舊蔡河名東蔡河即所謂惠民河也又至陳州東南蔡河口入沙河以通陳蔡汝潁諸州之漕運元至元二十七年黃河決祥符之義唐灣而西蔡河上源湮塞其汴河下流亦皆淤塞而不能東達淮泗水亦入於蔡河後以水淺不能行舟乃立閘以積水洪武初自裏城東南置小木閘一十有九處以通舟楫洪武三十二年黃河泛溢而河及閘俱被湮廢今南薰門內東西有河積水弗涸不復通舟楫矣是以河之上有東西二橋見存東曰小橋直對南薰門西

曰雷家橋在今南察院前即巡撫治所也

國朝會要 惠民河與蔡河一水即閔河也建隆元年始命陳承昭督丁夫導閔河自新鄭與蔡水合貫京師南歷陳潁達壽春以通淮右舟楫相繼商賈畢至都下利之於是西南為閔河東南為蔡河開寶六年始改閔河為惠民河

九域志 浚儀縣之琵琶溝即蔡河也

資治通鑑注 蔡河古之琵琶溝在浚儀縣杜佑曰漢運路出浚儀十里路入琵琶溝至陳州而合宋白曰建中初杜佑改漕路自浚儀西十里路其南涯引流

入琵琶溝經蔡河至陳州合潁是秦漢故道自隋開
汴河利涉揚楚故官漕不復由此道佑始開之

楓窻小牘 汴京河渠凡四曰蔡河自陳蔡由西南戴
樓門入京城繚繞向東南陳州門出曰汴河自西京
洛口分水從東水門入京城繞州橋御路水西門出
曰五丈河來自濟鄆由新曹門入通汴河曰金水河
自京城西南分京索河築隄從汴河上用木槽架過
從西北水門入京城夾牆遮擁入大內灌後苑池浦
先是詔析金水河透槽回水入汴北引洛水入禁中
賜名天源河然舟至啟槽頗妨行舟乃自城西起宇

坊引洛水由咸豐門立隄凡三千三十步水遂入禁
中而槽廢

金水河

按一統志金水河在鄭州西南二十五里宋時引入汴
京故名

汴京遺蹟志 金水河一名天源本京水導自滎陽黃
堆山其源曰祝龍泉建隆二年春命左領軍衛上將
軍陳承昭率水工鑿渠引水過中牟名曰金水河凡
百餘里抵都城西架其水橫絕於汴設斗門入浚溝
通城濠東匯於五丈河公私減利焉乾德三年又引

貫皇城入後苑內庭池沼水皆至馬開寶九年帝步
自左掖按地勢命水工引金水由承天門鑿渠為大
輪激之南注晉王第大中祥符二年詔供備庫使謝
德權決金水自天波門至乾元門歷天街東轉繞太
廟入后廟皆甃以礮甃植以芳木車馬所經又疊石
為閘梁作方井官寺民舍皆得汲用復東引由城下
水竇入於濠京師便之元豐五年金水河透水槽阻
礙上下汴舟遣宋用臣按視請自板橋別為一河引
水北入於汴後卒不行乃由副隄河入於蔡以源流
深遠與永安青龍河相合故賜名天源先是舟至啟
槽頗滯舟行既導洛通汴遂自城西起宇坊引洛水
由咸豐門立隄凡三千三十步水遂入禁中而槽廢
然舊惟供洒埽至政和間容佐請於七里河開月河
一道分減此水灌溉內中花竹命宋昇措置導引宣
和元年復命藍從熙孟揆等增隄岸置橋槽壩牖濬
澄水導水入內內庭池籩既多患水不給又於西南
水磨引索河一派架以石渠絕汴南北築隄導入天
源河以助之自金元以來淤塞無存矣

大黃寺河

按大黃寺河一名埽頭河在城東北三十五里即黃河

之支流也

五丈河

按汴京遺蹟志五丈河在安遠門外唐武后時引汴水入白溝接注湛渠以通曹充之賦因其廣五丈故名五丈河即白溝河之下流也唐末湮塞周顯德四年疏汴水入五丈河自是齊魯舟楫皆達於汴六年浚五丈河以通漕運建隆二年正月遣使往定陶規度發曹單丁夫數萬以浚之歲漕上供米六十二萬石太祖曰勞民奉已朕不忍為今浚河不獲已也三月幸新水門觀放水入河先是五丈河泥淤不利行舟詔陳承昭於京城

之西夾汴水造斗門引京索蔡河水通城壕入斗門俾架流汴水之上東進於五丈河以便東北漕運公私咸利三年正月遣陳承昭護修五丈河車駕臨視賜承昭錢二十萬乾德三年京師引五丈河造西水磴太平興國三年正月命發近縣丁夫浚廣濟河其河自汴城西則名白溝由善利水門東北則名五丈其實一河也後更名廣濟河金元以來累經黃河泛溢淤塞沂公筆錄國初方隅未一京師儲廩仰給惟京西京東數路而已河渠轉漕最為急務京東自濰密以西州郡租賦悉輸沿河諸倉以備上供清河起青淄合

東阿歷齊鄆涉梁山灤濟州入五丈河達汴都歲漕
百餘萬石所謂清河即濟水也而五丈河常苦淤淺
每春初農隙調發衆夫大興力役以事開濬始得舟
楫通利無所壅遏太祖素知其事尤所屬意至歲中
興役之際必輿駕親臨督課率以為常先是春夫不
給口食古之制也上惻其勞苦特令一夫日給米二
升天下諸處役夫亦如之迄今遂為永式
道山清話 元符二年十二月一日水開五丈河數處
波浪湧起亦有聲如潮水高丈餘數日而止
埤雅廣要 宣和元年五月有龍見於京師茶肆傭晨

興見大犬蹲榻傍近視之則龍也軍器作坊兵士取
而食之逾五日大雨如注歷七日而止京城外水高
十餘丈帝懼甚命林靈素治水不驗遂命戶部侍郎
唐恪決汴水下流入五丈河起居郎李綱言國家都
汴百五十餘年矣夫變不虛生必感召之灾望求直
言採而用之以答天戒詔貶一官為縣去

六丈河

按河南通志六丈河在城北封邱門外世傳宋時恐河
水為患故開此河以殺其勢

祥符縣志 諺云爾有三丈水我有六丈河即是河也

洪武二十四年及三十二年兩遭黃河泛溢淤塞焉

伯俞河

按伯俞河在城西南三十里八角保伯俞村漢孝子韓伯俞居此故名下流南經木魚寺北合汴水至通許清水口入黃河蓋其河自中年界東流至八角保則名伯俞河下至新倉則名安家河至鄭店則又名魯溝河隨地而異名其實一河也

祥符縣志 韓俞字伯俞有過其母笞之泣母曰他日

笞子未嘗泣今泣何也對曰俞得罪笞常痛知母之力猶壯故受而不泣今母之力不能使痛知母力已

衰受而輒泣乃以母老將至也今縣西南八角保有

伯俞河南有伯俞村即所居之處此河亦以孝而得名也

掣水河

按祥符縣志掣水河有二一在城南戴樓門外其流東一在城東揚州門外其流南二流奔至東南相合為一南至赤倉保鍾家岡達於黃河其河之名古未有也至永樂二年因河水為患城之內外積水不涸有司督率軍夫始開導以利民是後河雖溢流而水不復入城故名

名

沙海

按一統志沙海在城西北十二里隋文帝疏鑿舊跡引汴水習舟師平陳後立碑其側以紀功累經河水淤平莫詳其處

戰國策 齊欲發卒取周九鼎顏率說曰夫梁之君臣欲得九鼎謀於沙海之上為日久矣

升菴詩話 戰國策暉臺之下沙海之上九域志有沙海孟浩然和張三自穰縣還途中遇雪詩風吹沙海雪來作柳園春正是梁地事

牧澤

按牧澤在城東南吹臺北一名蓬陂累經河水淤平真宗時即其地鑿為池曰凝碧池

陳留風俗傳 浚儀縣北有浚水像而儀之故曰浚儀縣有倉頡師曠城上有列仙之吹臺北有牧澤中出蘭蒲土多雋髦今帶牧澤方一十五里俗謂之蒲關澤

湛渠

按一統志湛渠在府城外唐載初元年引汴水注白溝以通漕運久經黃河泛溢淤為平地矣

白溝

按汴京遺蹟志白溝無山源每歲水潦甚則通流纔勝百斛船踰月不雨即竭至道二年內殿崇班閻光澤國子博士邢用之上言請開白溝自京師抵彭城呂梁口凡六百里以通長淮之漕詔發諸州丁夫數萬治之以光澤護其役議者非之會宋州通判王矩上表極陳其不可且言用之田園在襄邑歲苦水潦私幸渠成遂罷其役咸平六年用之為度支負外郎又令自襄邑下流治白溝河導京師積水而民田無害熙寧六年都水監丞侯叔獻請儲三十六陂及京索二水為源倣真楚州開平河置牖則四時可行舟因廢汴渠帝曰白溝工料

易耳第汴渠歲運甚廣河北陝西資焉又京畿公私所用良材皆自汴口而至何可遽廢王安石曰此役苟成亦無窮之利也當別為漕河引黃河一支乃為經久馮京曰若白溝成與汴蔡皆通漕為利誠大恐汴河終不可廢帝然之詔劉璿同叔獻覆視八月都水監言白溝自濰河至於淮八百里乞分三年興修其廢汴河俟白溝畢工別相視仍請發穀熟淤田司并京東汴河所隸河清兵赴役從之七年正月都水監言自盟河畎導汴南諸水近者失於疏浚為害甚大於是輟夫修治而白溝之役廢初王安石欲罷白溝修汴南水利帝曰人多

以白溝不可為而卿獨見可為安石曰果不可為罷之
誠宜若可為即俟時為之何必計校人言也政和二年
十月都水監丞孟昌齡言開濬含暉門外白溝河開堰
放水仍舊通流

溝洫

按汴京遺蹟志汴都地勢廣平賴溝洫以行水潦景德
二年五月詔開京城濠以通舟楫毀官水磴三所三年
分遣入內內侍八人督京城內外坊里開濬溝渠先是
京都每歲春疏濬溝瀆而勢家豪族有不即施工者帝
聞之遣使分視自是不復有稽遲者以至雨潦暴集無

所壅遏都人賴之大中祥符三年遣供備庫使謝德權
治溝洫導太一宮積水抵陳留界入亳州渦河五年三
月帝宣示宰臣曰京師所開溝洫雖屢鈐轄仍令內侍
分察吏擾天聖元年八月東西八作司與內殿承制閣
門祇候劉永崇等言內外八廂創置八字水口通流雨
水入渠甚利慮所置處豪富及勢要阻抑乞下令巡察
從之凡溝洫上廣一丈底廣八尺其深四尺地形高處
或至五六尺以此為率二年七月內殿崇班閤門祇候
張君平等言準勅按視開封府界至南京宿亳諸州溝
河形勢疏決利害凡八事詔令頒行熙寧元年三月都

水監言畿內溝河至多而諸縣各役人夫開淘十纜二三須二三年方可畢工請令府界提點司選官與縣官同定緊慢工料據合差夫數以五分夫役十分工依年分開淘提點司通行點校從之二年閏十一月詔以府界道路積水妨民輸納命都水監差官溝畎元豐五年詔開在京城濠澗五十步深一丈五尺地脉不及者至泉而止大觀元年七月以京城霖雨水浸居民道路不通遣官分督疏導是月又詔自京至八角鎮積水有妨行旅轉運司選官疏導修治橋梁毋使病涉

河南通志

張君平字士衡滏陽人以父承訓與契丹

戰沒補官遷右班殿直擢閤門祇候管勾汴口建言歲開汴口當擇其地則水湍駛而無留沙歲可省兵百餘萬從之天聖中君平以京師數罹水災請委官疏鑿近畿諸州古溝洫久之稍完遂詔畿內及近畿州縣長吏皆兼管勾溝洫河道君平有吏材尤明於水利自議塞河朝廷每訪以利害河平君平卒論者惜之

宋東京考卷之十九 全

宋東京考卷之二十

嘉興石匏周 城緝

岡

奉聖岡 在城西南十里許以其地有奉聖寺故名金章宗時有二鳳凰率諸鳥飛集於此人遂稱為鳳

凰岡亦曰鳳城岡

青龍岡 在城西南十五里一名杏花岡

牟駝岡 一作毛駝岡在城西北十五里天駟監牧養御馬駝騾之所後黃河衝激坍塌平夷矣

世史正綱 靖康元年春金將幹離不統鐵騎南馳攻

圍汴京屯兵於此

望牛岡 在城西南十三里汴城形勢如卧牛狀登是岡以望之則居然可見故名春月都人遊賞於此

牛尾岡 在封邱門外東一里許俗以汴城為卧牛城而此岡則牛之尾也

百岡 在城東北三十里有土堆百餘因名世傳宋文帝元嘉中檀道濟與北魏戰糧盡而返魏軍襲之道

濟於暮夜唱籌量沙積至百堆以給之魏軍見之果退道濟全師而還

狼城岡 在城西三十里

侯家岡 在城南十八里

霍赤岡 在城東北二十里遼主耶律德光滅晉嘗屯兵於此

藥局岡 在城西二十里舊為朝元宮藥局

埃子岡 在城南六十里

井家岡 在城西十五里

七里岡 在城西七里故名

八角岡 在城西三十里

白墓子岡 在城南二十里

萬龍岡 在城東南五十里一名望龍岡

祝岡 在城東南十五里

蘇村岡 在城東南十里岡下有蘇氏聚族而居因名

獨樂岡 在城東十五里都人九日於此登高

汴京遺蹟志 相傳有一富翁居此男女婚嫁已畢不問家事日邀故舊飲酒為樂徽宗微行見之羨曰斯

人其獨樂哉後因名其岡

毛岡 在城東南二十五里

鷓村岡 在城南五十里嘗命獵者養鷹鷓於此因名

黑岡 在城西二十五里其土黑色故名岡下有池多魚今涸又名涸魚岡

太平岡 在城東二十里

沙窩岡 在城東二十五里

長腰岡 一名長葉岡在城東北二十五里

仙遊岡 一名牽牛岡在城東北二十五里昔有二老人牽二牛過此岡人異而問之忽不見故名

鐘家岡 在城東南五十里

赤倉岡 一名關頭岡在城東南四十五里

袁家岡 一名北神岡在城東北二十五里

南神岡 在城東北二十里

縮頭岡 在城東二十五里

角橋岡 在城東北五里

邊村岡 在城東五里

殷家岡 在城東十里

白石岡 在城東二十五里上有石皆白色故名

胡岡 在城東二十五里

傅家岡 在城東二十里

楊子岡 在城東二十里

槐疔疸岡 在城東北三十里

兔白岡 在城東北四十里

蘇家岡 在城西五里

獅子岡 在城西十五里

樊家岡 在城東

廟兒岡 在城南三十里

接沙岡 在城西北永安保西

奉神岡 在城南

以上諸岡累經黃河衝淤存者無幾而土人猶得指其遺跡焉

堆

青堆 有二一在城東密務保東一在城西南毛保西

申家堆 在城西北永安保

大營堆 在城西南八角保東

王家堽 在城西南毛保東南

坡

幕天坡 在封邱門外李綱嘗敗金兵於此後為河水淤平

胭脂坡 在城西北東和保西朝暮斜暉照之宛若胭脂俗呼為紅沙岡

坡

夏侯坡 在城西南十五里朱仙鎮保

好草坡 在城西南十五里朱仙鎮保岳武穆禦金人在此坡牧馬草生極茂故名

傳講雜記 都城西南十五里有地名麀糟坡土人惡

之自易其名曰好草坡

葦薺陂

在宋門外因水中多生葦薺故名收燈後都人探春於此

寒陂

在城西南

牧兒陂

在城西南

練子陂

一名留子陂一作劉子陂在封邱門外西南周太祖入汴與慕容彥超戰於此

青頭陂

在城西南

隄

滂隄

按一統志自城東至歸德三百餘里世傳漢梁孝王徙都睢陽時所築今俗訛為蓼隄

金隄

按括地志一名千里隄漢順帝陽嘉中自汴河口以東緣積石為堰曰金隄

續文獻通考

按金隄古堰自開封府滎陽縣東經大名府清豐南樂縣界由東郡至千乘海口千有餘里

歷代築以禦河患通謂之金隄嗚呼循金隄之遺跡稽黃河之故道合諸賢之卓見踵永賴之懋功推古驗今灼灼可行者但世習樂因循而憚改作此在今日勢尤難行後世哲人有作破拘攣之見或有取於吾言爾矣

隋隄

一名汴隄在汴河上按隋煬帝大業三年命尚書左丞皇甫誼復西通濟渠作石陡門引河水入汴汴水入泗以通於淮築隄樹柳御龍舟行幸以達於江都人稱其隄曰隋隄

山堂肆考

隋煬帝自板渚引河達於淮海謂之御河

河畔築街道樹以柳名曰隋隄計一千三百里

智囊補

熙寧中睢陽界中發汴隄淤田汴水暴至隄

防頗壞陷將毀人力不可制時都水丞侯叔獻泣役相視其上数十里有一古城急發汴隄注水入古城中下流遂涸使人急治隄陷次日古城中水盈汴流復行而隄陷已完矣徐塞古城所決内外之水平而不流瞬息可塞衆皆服其機敏

揚州鼓吹詞序 隋大業初開邗溝入江旁築御道樹以楊柳謂之隋隄隄今不復可考然記稱一千三百餘里則江河一帶皆其故跡矣但柳花飛落無復青青空有長條繫人亡國之恨耳

落藜隄 在固子門外西北因其地生落藜故名

接岡隄 在城西北永安保西接沙岡

護城隄 離城三里一名三里隄西北接金村遶城圍抱東南直抵蘇村蓋築以防水者後被河水衝圯明正統間巡撫侍郎于謙因河水泛溢侵逼汴城虔致禱誓以身殉河遂消縮乃築東西北三面以禦之範鐵犀勒銘其背以鎮永遠景泰二年巡撫都御史王暹補築南面與東西相接凡四十餘里號大隄天順五年侍郎薛遠因河水入城乃於麗景門置石閘以洩内外積水

湧幢小品 黃河之隄莫壯於開封余考宋初黃河尚在滑州相去三百里漸決遂直抵開封城下國初幾欲遷王府隄之所以益固也近日祖其說治運河有長隄遙隄縷隄等名其費不貲而衝決如故看來開封之隄紆曲堅壯制度絕佳其妙處全在紆曲因水

勢既猛隄若徑直全當其鋒勢必不支惟紆曲則若
 迎若避迎以抵之避以殺之今之橋堵亦用此法即
 宋藝祖剪紙圈築都城之意乃若運河之隄勢必不
 能紆曲又卑薄太甚如何禦水即堅壯亦止禦得散
 漫之水如何禦得衝決之水惟度其勢之所至預設
 埽以待可以徐徐幹轉

橫隄

在鄭門外南接大隄北抵接岡隄保

婁隄

在城東婁隄保南北約十里餘

高門隄

在固子門外西北西連落藜隄因在梁惠王古城高門之北故名

金村隄

在城西北西接高門隄因在金村之側故名

十八里隄

離城一十八里故名西北接封邱縣界東南抵密務保太平岡築以防水後被河水衝圯

夾隄

在固子門外築以夾護金水河西接中牟東抵外城後圯於河

汴護隄

在城西舊汴河北岸

金水隄

在裏城外西至固子門東抵城濠

閘

小木閘

在裏城外東南

惠濟閘

在陳州門外

獨樂閘

在城南白墓子岡東

赤倉閘

在城東南赤倉保西

萬龍閘

在城東南赤倉保南

以上諸閘俱為蔡河而設元末廢壞明洪武初重修二十四年黃河南徙蔡河及閘皆為淤塞無存

洞

桃花洞

在揚州門內西北即上清宮道士所居之處環植以桃故名桃花洞

潭

蓮花潭

在城東十里

清水潭

在城西三十五里

龍潭

在城外四十里南北隄口有左右二潭歲旱禱雨輒應

赤倉潭

在城東南四十五里

以上洞潭諸蹟俱湮於河

渡

杏花營渡

在城西南十五里路通中牟縣

八角渡

在城西南三十里路通中牟縣

白墓子岡渡

在城東南十五里路通咸平縣

赤倉渡

在城東南三十里路通咸平縣

梁家淺渡

在城南十五里路通尉氏縣

以上五渡俱濟黃河以河徙而廢

陳家口渡

在城東南二十里路通尉氏縣

善善李渡

在城南二十五里路通尉氏縣

清水河渡

一名清河口渡在城南三十里

以上三渡俱濟黃河之支流以河徙而廢

泊

刺史泊

在城東南鄭店保南因唐刺史鄭公種葦於此故名

楊岡泊

在城東北霍赤岡保

楊六郎宅水泊

在裏城內西北本楊六郎宅外湖泊故名

龔家泊

冉家泊

牛家泊

俱在城西南八角保

以上諸泊俱湮於河

關

臨蔡關

在城東南赤倉保周顯德中浚開河入蔡河命水軍駕戰艦沿潁入淮以伐南唐置關於此金

季關廢土人仍呼其地為關頭

天津關

在城東北馬尾墻保埽頭河周顯德四年疏汴水入五大河以通齊魯舟楫於此設關元時河

漲淤塞

橋梁

天漢橋

唐名州橋在府治東南一里許正對大內御街與相國寺橋皆低平不暹舟楫惟河水平身可過並以青石為之石梁石筭楯欄及近橋兩岸皆石辟雕鐫海馬水獸飛雲之狀橋下密排石柱蓋車駕御路也

癸辛雜識

汴京天漢橋上有奇石一大片有自然華

齋圖山青水綠河黃路白粲然如畫真異物也後聞

移置文廟中作拜石

浚儀橋 在府治西南

興國寺橋 一名馬軍衙橋 在府治西南

相國寺橋 在府治東南

龍津橋 在府治東南蔡河上又名新橋

觀橋 在五嶽觀後故名

宣泰橋

橫橋子

高橋

西保康門橋

太平橋

鞞麥橋

第一座橋

宜男橋 已上八橋俱在陳州門裏蔡河上

四里橋 在戴樓門外

虹橋 在東水門外七里其橋無柱皆以巨木虛架飾以丹雘宛如飛虹其上土橋亦如之

上土橋

下土橋

順成倉橋

便橋 以上四橋俱在東水門內外

太師府橋 在府治西南丞相蔡京宅前因名

金梁橋 在東水門裏

雷家橋 在府治南蔡河上龍津橋西

小橋 在南薰門內蔡河上

宣化橋 在府治前

西浮橋 在宜秋門外舊以船為之後用木石改造

小橫橋

廣備橋

藥市橋

青暉橋

染院橋

朱雀橋

白虎橋

五王宮橋 以上諸橋俱在宜秋門外

念佛橋 在曹門內內諸司軍營皆在曹門侵晨上直有替者在橋上念經求化故名

板橋 在新鄭門外於此道敗金人於此師

洗馬橋 在新鄭門外

得勝橋 在城內

雲驥橋 在麗景門外迤南

白鵲橋 在固子門裏

駱駝橋 在鄭門外

以上諸橋皆在京城內
外汴蔡二河故道上

陳橋 在城東北四十里即
藝祖為眾擁立處也

玉照新志 陳橋在京師陳橋封邱二門之閫藝祖啟

運立極之地也始藝祖推戴之初陳橋守門者拒而

不納遂如封邱門抱關吏望風啟鑰逮即帝位斬封

邱而官陳橋者以旌其忠於所事焉

井

花園井 在府治西南朝元萬壽宮
相傳謂楚項羽御花園井

閻門井 在文德殿左掖東上閻門之東其水絕佳山谷
憶東坡烹茶詩云閻門井不落第二竟陵谷簾

書空誤

相國寺井 有二在聖容殿前東西木工喻浩建有
井亭極其精巧為相國寺十絕之一

海眼井 在安遠門裏上方寺內相傳泉源通
海故名元末寺燬於兵而井失其跡

八角井 在城西南水苦不可飲劉敞詩有誰鑿八角井
不竭泉苦更

永年之句

三眼井 在安業坊井口一
石而三眼故名

義井 在東水門裏金梁橋南相傳元時邑民劉道源因
往來人眾造亭於上設汲水之具遇盛暑則汲以

濟人故名

汴京遺蹟志 國朝洪武中即宋故宮遺址建周王府

乃太祖第五皇子諡定始分封之國城中井水悉苦

難飲惟周府太廟前井水甘蓋宋大內舊井也

陵墓

倉頡墓

在城東北二十里時和保俗呼為倉王家旁有倉王城世傳倉頡所築按禪通紀倉頡居陽武而葬利鄉路史云今開封之祥符故浚儀縣即春秋之陽武高陽鄉也或曰利鄉疑即時和保之墟也

真珠船

述異記倉頡墓在北海俗呼為藏書臺一統

志倉頡墓在陝西白水縣又大名府南樂縣河南祥

符縣山東壽光縣並有倉頡墓白水即古之衙壽光

即北海地然未詳孰是也

按方輿勝覽倉頡冢亦載有數處又皇覽冢墓記倉

頡冢在馮翊衙縣利陽亭南道傍高六丈學書者皆往上姓名投刺祀之不絕

梁王墓

在城西八角保高三大廣百餘步無碑文可考世稱魏陵鄉地名梁固疑即魏侯瑩之墓也

段干木墓

在城西北二十里

信陵君墓

在城東南揚州門之南魏公子無忌卒葬此

朱亥墓

在城西南俗呼為屠兒原蘇軾詩有昔日朱公子雄豪不可追今來遊故國大家屈稱兒之句

塵史

朱亥墓在都城南過所謂四里橋之道左旁有

祠垣宇甚全木亦茂呼為屠兒墓園清明則衆屠具

酒肴祀之出於人情也

老學菴筆記

王荆公素不樂滕元發鄭毅夫目為滕

屠鄭酤然二公天資豪邁殊不病其言毅夫為內相

一日送客出郊過朱亥冢俗謂之屠兒原者作詩云

高論唐虞儒者事賣交負國豈勝言憑君莫築金椎

陋却是屠酤解報恩

尚友錄 朱亥大梁人勇俠隱於屠肆侯嬴薦之魏公
子無忌使奉辭謝秦秦王怒使置之虎圈亥髮上衝
冠瞑目視虎虎不敢動遂以禮遣復使亥袖四十觔
鐵椎擊殺晉鄙奪其兵符退秦存趙

扁鵲墓 在闔闔門外西北菩提寺東原在子城內唐元和十五年宣武軍節度使張弘靖從葬於此相傳四傍土可以為藥禱而求之或得丸如丹劑

張儀墓 在城東北七里儀魏人也為秦相卒葬此

趙王墓 在城東北母寺保漢趙王張耳墓也

昭靈陵 在城東北四十五里馬尾墻保漢高祖母昭靈后陵也其地即春秋宋之黃鄉陵寢冢經黃河

平 淤

陳留風俗傳 小黃縣者宋地陽武之東黃鄉也因黃

水以名縣沛公起兵野戰喪皇妣於黃鄉天下平定

乃使使者以梓宮招魂幽野於是有丹蛇在水自洒

濯入於梓宮 水經注丹蛇作丹旒云於是其浴處有丹旒自水濯洗入於梓宮

遺髮 一作髻 馬故諡曰昭靈夫人因作寢以寧神也

東觀漢記 虞延字君大陳留人為都督郵世祖東巡

路遇小黃高帝母昭靈后園陵在焉詔呼引見問園

陵之事延進止從容跪拜可觀其陵樹株柏皆諳其

數俎豆犧牲頗曉其禮帝善之

蔡邕墓 在城東北四十里

畢卓墓 在府治北劉敞詩有蓬蒿道旁冢云是晉時賢名聲與陵谷共盡亦千年之句

李衛公墓 在城西南開店保唐李靖葬此墓旁有祠

段志賢墓 在城西南開店保之王家莊

單雄信墓 在望春門內西北隅旁有單將軍廟明初為左護衛軍營

陶穀墓 在東水門外

畫墁錄 東水門外覺照院元祐末予緣幹適彼與寺

僧縱步道旁指一壙云此陶穀墳也墓門洞開其間空無一物因諷寺僧為之掩覆僧曰屢掩屢開不可曉十餘年前有陶姓人作寒食爾後不復來陶為人輕檢嘗自言頭骨當珥貂蟬今則髑髏亦不羨早矣

紺珠閒錄 陶穀性險惡好陷害人初自單州判官為

晉相李崧收用遂得入閤及崧歸漢徐逢吉有意害之穀乃迎意構成崧事遂致赤族之禍後穀死葬於覺照院墓門屢掩屢開院僧復為築塞忽雷雨大作墓門洞開無一物矣

堯山堂偶雋 太祖之受周禪也百官班定猶未有禪詔翰林承旨陶穀出諸袖中遂用之穀意希大用及范質拜相穀草制詞曰十年居調燮之司一旦得變通之術質泣訴於太祖由是薄其為人終身不獲大用

李駙馬墓

在城東北二十里南神岡尚太宗女荆國大長公主左龍武軍駙馬都尉累遷鎮國軍節

度使知許州贈中書令
諡和文李遵勗墓此

石林燕語

祖宗時駙馬都尉宅主薨例皆復納入官

或別賜第曹沂王宅許懷德舊第也李和文宅亦王

貽永舊第自和文始世有之宏麗甲諸主第園池尤

勝號東莊和文好賢樂士以楊文公為師友其子孫

多守家法一時名公卿率從之遊宣和間復取以為

擷芳園後改寧德宮以居寧德皇后云

國老談苑

李遵勗為駙馬都尉折節待士宗楊億為

文於第中築室塑像晨夕仲函丈之禮刻石為記

幾億卒

李留後墓

李留後名端懿駙馬遵勗子也官至寧遠軍節度觀察留後祔葬於父遵勗墓側

宋稗類鈔

李端懿問卜人李易簡曰富貴吾不憂但

問壽幾何易簡曰君大長公主之子生而富貴窮奢

極欲又求長壽當如貧者何造物如此無乃太不均

乎遂不與卜

王旦墓

在城東大邊村旦本大名莘縣人父祐知開封府因家焉卒葬此

容齋隨筆

祥符以後凡天書禮文宮觀祭祀巡幸祥

瑞頌聲之事王文正公旦實為參政宰相無一不預

公知得罪於清議而固戀患失不能決去及臨終乃

宋書卷之二十一
欲削髮僧服以殮何所補哉魏野贈詩云西祀東封俱已了好來相伴赤松遊可謂君子愛人以德矣歐陽文忠公作公神道碑悉隱而不書蓋不可書也公持身公清無一可議然獨有此者功名之際人所難耳

劇談錄 魏野咸平景德間隱士和易通俗人樂從之遊王魏公當國尤愛之亦數相聞天禧末魏公屢求退不許野寄以詩曰太平宰相年年出君在中書十_五秋西祀東封俱已了好來相伴赤松遊魏公亟袖以聞遂得謝

資治通鑑 且臨終遺令削髮披緇以殮蓋悔其不諫天書之失也諸子欲奉遺令楊億以為不可乃止廉吏傳 且疾甚遺戒子弟我家盛名清德當務儉素保守門風勿為厚葬以金寶置櫃中帝親視疾賜白金五千兩且作奏謝之藁末復益四句云益懼多藏况無所用見欲散施以息殃咎即昇至內閣詔不許湧幢小品 無垢居士言讀書攷古人行事既已信其大節若小疵當缺而勿論蓋其間往往有曲折人不能盡知者如歐陽文忠公誌王文正公墓言寇準從公求使相寇公正直聞天下豈向人求官者若此類

宜慎言之。余謂世間如此類甚多。若宋子京為晏臨
菑門下士。晏公罷相。制有廣營產以殖貨。多役兵而
射利等語。亦未必遂真也。

丹陽伯墓

在城西南八角保大營舖
南丹陽伯葛景先墓此

呼延贊墓

在城西南朱仙鎮東北原上咸平三年
贊掌護元德皇后園陵儀衛還卒墓此

尚友錄

呼延贊太原縣人。累功績官至康州團練使。

有膽勇徧文其體為赤心殺賊字。至於妻孥僕使皆
然。諸子耳後別刺字曰出門忘家為國臨陣忘死為

主

周令公墓

在城西南
關店保

永泰縣三墓

在城西南
關店保

祥符縣志

永泰縣主宋太祖從孫女性慧孝。動循女

誠年十四歸右班殿直梁子才。克執婦道。事舅姑孝
謹。夫亡時年二十二。哀毀幾殞。諸族欲奪志。永泰以
節自誓。終身不渝。初封共康郡君。元豐中加封以
褒榮之。

向太夫人墓

在城東北二十里向文
簡公敏中祖母墓此

宋稗類鈔

向文簡公父欲葬其母時。開封府城外有


地。識曰綿綿之岡。勢如奔羊。稍前其穴。后妃之祥。術
者以穴在一小民菜園中。恐民不肯與。因夜葬其地。

民以向橫訴於府尹尹令重與之價仍不廢其菜次年遂生文簡公欽聖后文簡孫也

曹仙姑墓

在城南開店保按仙姑諱道冲字冲之其先寧晉人襄悼鄆國公利用之族孫也父宗喆欽州靈山縣主簿母石氏五代晉之後初鄆國公章聖時和戎有勳賜第都城因居汴仙姑自扶坐能言便解文字五歲賦詩屬文十五歲古今載籍所記極博家人患其弄翰墨即登屋賦詠書遍萬瓦洞徹諸教皆得其要妙嘗謂處世居家均在樊籠不願嫁適脫身遷去二十一歲隱於少室山玉華峯柶柶神導氣者十餘年家人踪跡之則宛轉潛避齊入張公諫議知其異度為女冠因遙指青州遠遊觀張幾真為師既而受籙於閭皂山晚入京師衣足蔽體食僅充腹廕容膝之地混然與猶犬同跡都人供饋者有踵相摩多所不納有不能却尋以施予不茹葷血但日市以食猫犬或詰其故曰無他救其欲殺者而已或謗其肉食者即取以對食曰於道何害但不欲耳徽宗召對無時給金牌二聽赴行在與諸池苑無得

止延見異數莫與倫比詔加清虛文逸大師初名希蘊至是始賜今名又加道真仁靖先生並為起第乃瀝懇牢辭不得已僅受數楹以奉三清晨夕焚修用祝君壽詔名其室為寶籙堂又為營保慶泰寧宮於其側將落成而尸解上為之惻然贈號希元觀妙先生



戊午六月二日讀訖
卷之二十一

